

# Powšitkowne WOZJEWJENJA

njedźelu, 6. decembra 2015

## Nyšpor z wotewrjenjom swjatyh wrotow

Wšitcy wěriwi su třecu adwentnu njedźelu, 13. decembra, w 14 hodź. k nyšporu do Róžanta přeprašeni. Na nim wotewru so swjate wrota Lěta smilnosće.

## Młodostni na adwentničku

Adwentnička serbskich młodostnych budže njedźelu, 6. decembra, we Wotrowje. Započatk je w 14 hodź. z nyšporom w cyrkwi, kotryž wuhotuje chór 1. serbskeje kulturneje brigady. Hladajo na to, zo chcemy so bórže na swětowe zetkanje młodžiny do Krakowa podač, poskići farar Tomaš Dawidowski dohlad do swojeje domizny. Mamy za was tež hišće překwapjenki spřihotowane. Budźće kusk wćipni!

## Kubłanske dny serbskeje młodžiny w Kopańcach

Pod heslom „Štó je mój bliši?“ přeprašujemy młodostnych wot 14 lět na kubłanske dny. Wo-ne budu wot pjatka do njedźele, 8. do 10. januara, w Kopańcach (Neuhausen). Wočakuja was Boža mša a duchowne impulsy, film a kreatiwita, zabawa a spěw. Přinošk zběra so wotpowědnje dochodow młodostneho – za šulerjow 30 eurow, wučomnikow a studentow 32 eurow a wuwučenyh 36 eurow. Přizjewjenja přijimuju so hač do pónđzele, 14. decembra, w Dekanatnym dušepastyrstwe we Worklecach pod telefonowym čisłom 03 57 96 (9 55 95), z mailku na don.boskowy-dom@t-online.de. abo přez facebookowu stronu dekanatneje młodžiny. Wjeselimy so na Was! *Leňka a Lucija, młodžinskej referentce, a dekanatny kružk*

## Na Marije bjezhrěšneho podjeća w Róžeńće

W Róžeńčanskej swjatnicy budu wutoru, 8. decembra, na swjedženju Marije bjezhrěšneho podjeća, kemše w 9 hodź. a po tym krótki nyšpor. Modlerska hodžina budže wot 17 do 18 hodź.

## TCM – „Łužica pomha“ prosy wo dary za Rumunsku

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ nuzu ćerpjace a chude džěci w zetkawanskim domje „Kerekudvar“ w rumunskim měšće Kereszturu podpěrać. K tomu je Katolski Posoł njedźelu, 29. nowembra, wobšěrny přinošk wozjewił. TCM prosy wěriwych wo šcedriwe dary na konto Cyrill-Methodius-Verein e.V. IBAN: DE 65 750 90 300 000 828 23 66, BIC GENODEF1M05, pod heslom „Rumunská“.

*J. Špitank, předsyda TCM*

## Muzejowy kofej zaběra so ze serbskeje zymskej drastu

Posledni lětuši Muzejowy kofej budže srjedu, 9. decembra, w 15 hodź. w Budyskim Serbskim muzeju. Do swačiny poskići Ilona Bierlingowa krótki přednošk wo serbskeje zymskej drasće wšěch regionow. Zajimcy měli so planowanja dla pod telefonowym čisłom (0 35 91) 2 70 87 00 přizjewić.

## **Příležitost k swjatej spowědži w Różeńće**

|  |  |
|--|--|
| <i>sobotu, 12. decembra</i><br>17.00 – 18.00 hodž. | farar M. Anders, farar G. Warnar,<br>farar M. Deleńk, farar B. Jakubaš         |
| <i>wutoru, 15. decembra</i><br>18.30 – 19.30 hodž. | farar G. Warnar, farar M. Anders,<br>farar G. Nawka, farar J. Magiera          |
| <i>sobotu, 19. decembra</i><br>17.00 – 18.00 hodž. | farar M. Anders, farar M. Kleiner,<br>kapłan G. Malinowski, farar M. Ulrich    |
| <i>wutoru, 22. decembra</i><br>18.30 – 19.30 hodž. | farar M. Anders, farar M. Nawka,<br>tach. farar W. Sćapan, farar D. Dzikiewicz |

## **Adwentny koncert Budyskich gymnaziastow**

Na swój tradicionelny adwentny koncert přeprašuje chór 1. serbskeje kulturneje brigady z.t. sobotu, 12. decembra, w 17 hodž. do Michałskeje cyrkwy w Budyšinje. Nimo znatych serbskich spěwow zaklinča pólske a ruske pěsnje kaž tež instrumentalne twórby. Wumělski nawod změje Friedemann Böhme.

## **Paslenje darikow**

Dekanatne dušepastyrstwo přeprašuje šulerki a šulerjow 6. do 8. lětnika sobotu, 12. decembra, wot 9.00 do 14.00 hodž. na paslenje hodownych darikow do Don Boskoweho domu we Worklecach. Zajimcy njech so prošu hač do wutory, 8. decembra, pod telefonowym čisłom (03 57 96) 8 87 07 we Worklecach přizjewja. Za wudawki zběra so na wobdźělnika přinošk we wysokosći dźesać eurow.

## **Předstajenje knihi „Hdže statok mój“ w Chróścicach**

„Hdže statok mój“ je titul knihi Berlinskeho awtora Bena Knebla, kiž je runje w Ludowym nakładnistwje Domowina wušla a kiž wěnuje so burskemu žiwjenju na wsy w 1940tych lětach. Na zakładze nazorneho wopisowanja domjaceho statoka a ródneje wsy Baćonja skići awtor dohlad do dźensa nimale pozabiteho wjesneho burskeho žiwjenja, kajkež wone tehdy we Łužicy běše. Dojimawje wopisuje Beno Knebel mjez druhim napohlad domskeho, dwór ze šćěpowcom a kołcom a pódlanske twarjenje z rězańcu a kólnju. Zeznajemy wochěžu ze swjećatkow swjateho Floriana, dobru stwu, ze zawarjenym sadom a peklowanym mjasom pjelnjeny wjelbik, wuhotowanje najstwy kaž tež dwór wobdawacu zahrodu ze zeleninu, kwětkami a małym hatkom. Knižna premjera budže sobotu, 12. decembra, w 19.45 hodž. w Chróścanskej putniskej hospodze.

*M. Mětowa*

## **Za Swětowe zetkanje młodžiny so přizjewić**

Serbscy młodostni podadza so klětu zhromadnje na Swětowe zetkanje młodžiny do Krakowa. Tute wotměje so wot 20. do 31. julija. Přizjewić měli so k tomu najpozdžišo hač do 20. januara 2016 z formularom. Tute su w cyrkwjach wupožžene. Samsny formular je pod [www.posol.de](http://www.posol.de) wozjewjeny. Wšitke nadrobne informacije su na tutych flajerach tohorunja podate.

## **Pytaja hojenskeho hladarja a kublarja**

Dom swjateho Jana w Smječkecach pyta sobudźělačerja z kwalifikaciju hojenskeho hladarja a kublarja (Heilerziehungspfleger) abo chorobnu sotru respektiwnje hladarja z wolu, žadanu kwalifikaciju nachwatać. W Janskich kupjelach bydla duchownje zbrašeni ludžo, kotrychž tam zastaruja a spěchuja. Pisomne požadanje njech pósćelu zajimowani na adresu: Christliches Sozialwerk gGmbH; Janska kupjel 1, 01920 Worklecy.